

# Slingervel



Maart 2021

*Christelike maandblad vir die jeug*





SLINGERVEL, JAARGANG 62  
Nommer 1026, Maart 2021

**A**s julle enige vrae of versoeke het, kontak my deur

- ⇒ 'n sms te stuur of te whatsapp na 084 551 2107,
- ⇒ of 'n e-pos te stuur na [slingervel@gksa.co.za](mailto:slingervel@gksa.co.za)



Lees meer oor die naaldekokker op bl. 12

## in hierdie uitgawe ...

- 3 Redakteursbrief**
- 4 Verjaardaghoekie**
- 8 Psalm 139 – Blokkiesraaisel**
- 10 Gemeentes in die Nuwe Testament (6)**
- 12 Op hierdie dag in Maart**
- 14 Jood, Jood en Jood**
- 16 Oplossing: Blokkiesraaisel – Psalm 139**
- Muskiete-jag**
- 17 Wat kan ek lees?**
- 19 God is die Skepper: die naaldekokker**

**REDAKTEUR**  
Dr. Hennie van Wyk  
e-pos: [hennie@gksa.co.za](mailto:hennie@gksa.co.za)

Tipografie en uitleg  
Joey Fourie  
e-pos: [kerkblad@gksa.co.za](mailto:kerkblad@gksa.co.za)

**MEDEWERKERS**  
Maryke Coetsee  
Susan Lourens  
Oom Abraham Krüger  
Hamus Bornman  
Stephan Kotzé

Eienaars en uitgewers  
Deputate vir Kerklike Tydskrifte  
Gereformeerde Kerke in Suid-Afrika  
Posbus 20008, Noordbrug 2522

Drukkers  
V & R Drukkery  
Tel. 012 333 2462  
[ludick@vrprinting.co.za](mailto:ludick@vrprinting.co.za)

Intekening  
Administratiewe Buro  
Afdeling Publikasies  
Posbus 20008, Noordbrug 2522  
Tel: 018 297 3986

Intekengeld  
R405,00 per jaar  
(posgeld en BTW ingesluit)  
R146,00 per jaar  
(elektroniese intekening)

Die Redakteur  
Bydraes en briewe  
Posbus 20008  
Noordbrug, 2522

Jaargang 62,  
Nommer 1026  
Maart 2021

ISSN 0037 685 X

# Redakteursbrief



Dagsê aan die Vellie-maats

**S**joe – dinge kan darem vinnig verander! Die een dag mag ons eredienste bywoon, die volgende dag nie.

Een ding is seker: COVID-19 het ons lewens heeltemal verander. Dis nou 'n jaar ná die eerste inperkings, en steeds is dinge onseker.

Baie van julle dink dat die dra van maskers niks meer snaaks is nie. 'n Paar jaar terug het ons baie keer foto's gesien van mense in China en Japan wat maskers dra – en gedink dat dit snaaks is. Hulle het dit gedra vir lugbesoedeling. Vandag is dit snaaks as iemand nie 'n masker dra nie ...

Baie jare terug, en nou praat ek van die tyd toe Jesus op aarde was, was daar al opvoerings in die teaters. Wat ook gebeur het, is dat vrouens nie toegelaat is om toneel te speel nie. Hoe nou gemaak? Elke karakter het 'n masker gedra, gewoonlik van klei gemaak. Daar was nie grimering nodig nie – jy sit net die masker op, en jy is daardie karakter.

Ons het ook 'n spreekwoord wat sê dat iemand 'n masker op het. Dit beteken dat hy of sy nie wil wys hoe hy of sy regtig voel nie.

Psalm 139:1 vertel vir ons twee baie belangrike dinge van ons verhouding met God. Hier is die 1983-vertaling: Here, U sien dwarsdeur my, U ken my. In die 1953-vertaling: HERE, U deurgrond en U ken my. En in die Direkte Vertaling: HERE, U ondersoek my en U ken my.

Dit sê vir ons dat ons soveel masker kan dra en soveel kan probeer om dinge weg te steek, maar die Here sien elke liewe dingetjie raak. Die nadeel is dat, as ek verkeerde dinge dink en doen, die Here dit weet.

Daar is ook 'n mooi kant: die Here weet presies hoe ek voel as ek onseker of bang is. Al wat ek hoef te doen, is om vir Hom te vra om te help, Hy weet presies wat en hoe om die regte ding te doen.

Vir die Here kan ek nie 'n masker opsit nie. Ek kan nie maak of ek iets of iemand anders is nie. Hy ken my. Hy wil my ken. Hy het my lief, foute en al.

Ons moet ook onthou, in die woorde van Romeine 8: Niks kan ons skei van die liefde van God in Christus Jesus nie – nie eers 'n pandemie nie.

Dit moet ons die krag en die moed gee om elke dag op te staan en te leef soos 'n kind van die Here!

Groetnis




# Psalm 139

Maats

In Psalm 139 sien ons een van die mooiste gedeeltes in die Bybel (en in die letterkunde) oor die wonder van die mens se ontstaan en geboorte. Dawid verklaar dat God teenwoordig is by die ontstaan en geboorte van die mens, omdat ons na die beeld van God geskape is, en Hy het 'n spesiale plan en doel vir elke mens wat gebore word.

## OPLOSSING OP BLADSY 16



## LEIDRADE

### Af

1. Ek vra die Here om te kyk dat ek nie op hierdie pad is nie.
2. As ek opklim hierheen, is die Here daar!
4. Op hierdie wyse het die Here my geskep.
6. Maak nie saak waar ek is nie, hieraan hou die Here my vas.
8. Die Here het meer gedagtes as dit!
9. As ek hier gaan woon, is die Here daar!
11. Die Here weet as ek dít doen.

13. Hier het die Here my gevorm.

### Dwars

3. Die Here ken dít nog voor dit by my opkom.
5. Hy moet kyk dat die Psalm gesing word.
7. As ek hier gaan lê, is die Here daar!
10. Dit sal nie help om dit te vra om my weg te steek nie – die Here maak dit lig!
12. Die Here weet as ek dít doen.
14. Hulle moet van my af weggaan!
15. As ek hierheen vlieg, is die Here daar!
16. Hierin is my lewensdae opgeskrywe.





# Jood, Jood en Jood

Maats

**E**k het die volgende via *Whatsapp* van tannie Wilna van der Merwe ontvang:

*Graag sal ons kinders en kleinkinders meer wil weet in verband met die Jode.*

1. *Jode in die ou Testament*
2. *Jode in die nuwe Testament*
3. *Jode van vandag*
4. *Joodse geloof*

Ek antwoord graag!

## **Jode in die Ou Testament**

Ons lees in die grootste deel van die Ou Testament van Israel as die volk van God. Ons lees dat die Here vir Jakob die naam "Israel" gegee het. Jakob het 12 seuns gehad, en hulle het die 12 stamme van Israel geword.

Wanneer Josua die Israeliete in die land Kanaän inlei, kry elke stam sy eie grondgebied. Daar is tog iets wat belangrik is om op te let en te onthou:

- Josef se twee seuns se nageslag word twee van die stamme (Efraim en Manasse);
- Levi kry wel nie 'n landstreek nie, maar grond in elke stamgebied. Hulle moes die priesters van die volk wees, en hulle is versorg uit die tiendes wat aan die Here gegee is.

Tot en met koning Dawid was hulle onder die volke bekend as die "Israeliete". Hulle was een volk met een godsdiens. In Jerusalem het Salomo die tempel gebou, en almal het daar die Here gedien.

Elke dorp het ook sy eie sinagoge gehad – die woord wat gebruik word vir die kerkgebou wat die Here veral op die Sabbat aanbid is.

Toe Salomo koning geword het, het dit goed gegaan totdat hy ongehoorsaam geword het aan die Here. Die gevolg is dat die koninkryk verdeel is in die Noordryk en die Suidryk. In die noorde was Samaria die hoofstad en in die suide Jerusalem. Samaria was in die grondgebied van Efraim (ook die konings was Efraimiete) en Jerusalem in die landstreek van Juda/Judea.

Hier het 'n baie belangrike ding gebeur: nie net het die volk geskeur nie, die tempeldiens ook. Jerobeam wou nie hê dat sy onderdane Jerusalem toe gaan om te offer nie, en het tempels en hoogtes gebou waar hulle die Here kon dien. Dit was nie 'n opdrag van die Here nie.

Hierdie twee dele van dieselfde volk en dieselfde geloof het selfs op 'n stadium oorlog gemaak. So sien ons dat elkeen maar God op sy eie manier begin dien het, en dat die profete vir albei die groepe gepreek het.

Die prediking het veral gegaan oor die eiewilligheid van die godsdiens, dat hulle nie die Here alleen gedien het nie. So is die stamme van die noorde – bekend as die Israeliete – in 712 vC in ballingskap weggevoer en die volk oor die hele wêreld van daardie tyd versprei. Hulle het nooit teruggekeer na hulle land toe nie.

In 586 vC is die volke van die suide, bekend as die Jode of Judeërs, na Babel weggevoer. Ons weet dat die Here beloof het dat Jesus uit die stam van Juda gebore sou word. Daarom het Hy beloof dat hulle sou terugkeer uit ballingskap, terug na Jerusalem en Betlehem, wat gebeur het na 70 jaar. Nou was die volk wat teruggekeer het, bekend as Judeërs of Jode, afgelei van die grond en die stam Juda.

## Die Jode in die Nuwe Testament

Ongeveer 520 jaar na die terugkeer van die volk (Jode) uit Babel en die herbou van die tempel is Jesus gebore.

Die land was in die tyd van Jesus in drie dele verdeel: Galilea in die noorde, Samaria in die middel en Judea in die suide. Die Jode het in Galilea en Judea gewoon, en die Samaritane in Samaria. Die Samaritane het ook vir God gedien. Daar was egter vyandskap tussen die twee groepe. Die grootste rede hiervoor was dat die Jode, met die herbou van die tempel, nie die Samaritane wou toelaat om te help nie. Die Jode het net met Jode getrou terwyl die Samaritane met mense uit ander volke getrou het.


In Jesus se tyd het die Jode nie eers eintlik in die gebied van die Samaritane gekom nie – tensy hulle nie anders kon nie. Kyk na die kaart: as hulle van Galilea af Judea toe moes gaan, het hulle eerder deur Dekapolis en Perea gereis as deur Samaria. Kyk maar hoe verbaas is die Samaritaanse vrou as Jesus met haar praat in Johannes 4:9. Let ook op dat die Jood in die gelykenis in Lukas 10 nie eers die woord “Samaritaan” wou uitspreek nie!

In die tyd van Jesus het die Romeine oor Judea regeer. Pontius Pilatus was die goewerneur. In Handeling 2 lees ons ook van die gelowiges wat van regoor die wêreld na die tempel gekom het. As Paulus op sy sendingreise gaan, was die plekke waarheen hy gegaan het, die sinagoges. Dit was die kerkgeboue van die mense wat die Here van die Ou Testament, die God van Abraham, Isak en Jakob gedien het. Hulle geloof was dus die geloof van die Israeliete, terwyl hulle deel was van ander volke. Die “Jode” in die Nuwe Testament was dus die mense wat God gedien het, nie net in Judea nie, maar oor die hele wêreld.

## Die Jode vandag

In die jaar 70 nC val die Romeine Jerusalem weer binne. Hoewel Pontius Pilatus in Rome gewoon het, het die Jode só teen die Romeine in opstand gekom dat daar oorlog gekom het.

Die gevolg was dat daar ander volke oor die Jode regeer het en dat hulle nie toegelaat is om oor hulleself te regeer nie. 600 jaar later het die Islam ook in Jerusalem gekom en dit as een van hulle heilige plekke verklaar.




Die land Kanaän of Israel is deur ander volke regeer tot en met 1948, toe hulle weer ’n selfstandige land en volk geword het, met die Judaïsme as hulle godsdienst. Ek gaan in ’n volgende artikel jou meer vertel van die Judaïsme.


As julle bietjie kyk na wat vandag in Israel gebeur, is dit interessant dat al die volke rondom Israel deel is van die Islam (Moslemgeloof) en hulle die Jode haat.

Tog staan die Jode sterk vir hulle geloof. Kort-kort is daar oorlog met die onder andere die Palestyne, Siriërs en Egiptenare – almal wat beswaar gemaak het dat Israel ’n onafhanklike land word.

Volgende keer: Judaïsme – die geloof van die Jode vandag. <sup>sv</sup>



## Oplossing: Blokiesraaisel Psalm 139



### MUSKIETE-JAG ...

Jou vabond, wag, ek sal jou kry,  
 Van jou sal net 'n bloedkol bly  
 Hier op my kamermure,  
 Deur jou vervloekte gonsery,  
 Deur jou gebyt en plagery  
 Kon ek nie slaap vir ure.  
 Mag ek my voorstel, eer ons skei  
 Eer jy die doodslag van my kry —  
 My naam is Van der Merwe.  
 Muskiet, wees maar nie treurig nie  
 Wees ook nie so kieskeurig nie,  
 Jy moet tog één dag sterwe.  
 Verwekker van malaria,  
 Sing maar jou laaste aria —  
 Nog een minuut vir grasie  
 Al soebat jy nou nog so lang,  
 Al sê jy ook: ek es nie bang,  
 Nooit sien jy weer jou nasie ...  
 Hoe sedig sit hy. O, die krengr!  
 Sy kinders kan maar kranse bring,  
 Nou gaan die vabond sterwe ...  
 Pardoef! Dis mis! Daar gaan hy weer!  
 Maar dood sal hy, sowaar, ek sweer —  
 My naam is Van der Merwe!

**D**ie Afrikaanse digter AD Keet (broer van die Bybelvertaler BB Keet) is op 14 Oktober 1888, op Alice in die Oos-Kaap gebore.

Sy bekendste gedig, *Muskiete-jag*, het hy in sy losieshuiskamer in Nederland geskryf toe 'n groot muskiet hom lastig geval het. Nadat hy die muskiet doodgemaak het, het hy na bewering die reëls van dié gedig op 'n stukkie papier neergeskryf.

Die taalhistorikus Jaap Steyn skryf in sy boek *Ons gaan 'n taal maak* dat Keet se bundels *Gedigte* (1920) en *Verspotte gedigte vir verspotte kinders* (1931) Afrikaanse lesers lank bekoor het, en gedigte soos *Maar een Suid-Afrika* en *Ek hou van jou* het saam met die immergewilde *Muskiete-jag* volksbesit geword. Hy het eens gesê: "As ek net een reël in Afrikaans geskryf het, wat sal voortleef, is ek tevrede."

Keet kan voorwaar tevrede wees.

— AD Keet

(Bron: Kraal Uitgewers)